



საქართველოს მთავრობის განკარგულება

N981 2016 წლის 2 ივნისი ქ. თბილისი

საქართველოსა და ევროპის რეკონსტრუქციისა და განვითარების ბანკს
(EBRD) შორის 2013 წლის 25 ოქტომბერს გაფორმებული სასესხო

ხელშეკრულებით გათვალისწინებული „ჯვარი-ხორგას ელექტროგადამცემი
ხაზის“ მშენებლობის პროექტის 220 კვ ეგხ-ის მეორე (კმ 20-კმ 40) სექციის
განხორციელებასთან დაკავშირებით გასატარებელი ღონისძიებების შესახებ

1. ცნობად იქნეს მიღებული საქართველოს ენერგეტიკის სამინისტროს მიერ წარმოდგენილი ინფორმაცია, საქართველოსა და ევროპის რეკონსტრუქციისა და განვითარების ბანკს (EBRD) შორის გაფორმებული სასესხო ხელშეკრულების („ჯვარი-ხორგას ელექტროგადამცემი ხაზის პროექტი“) ფარგლებში (რეატიფიცირებულია საქართველოს პარლამენტის 2013 წლის 11 დეკემბრის №1725-IX დადგენილებით), „ჯვარი-ხორგას ელექტროგადამცემი ხაზის“ მშენებლობის პროექტის ზემოქმედების არეალში მოქცეულ მოსახლეობასა და მიწის ნაკვეთებთან დაკავშირებით განსახორციელებელი ღონისძიებების შესახებ, რომელიც ასახულია EBRD-თან შეთანხმებულ განსახლების პოლიტიკის ჩარჩო-დოკუმენტში.

2. შეთანხმებულ იქნეს „ჯვარი-ხორგას ელექტროგადამცემი ხაზის“ (500/220 კვ საჰაერო ელექტროგადამცემი ხაზების „ქვ. ხორგა-ქვ. ჯვარი“ და

„ქვ. ჯვარი-ეგზ „კავკასიონში“ შეჭრა) მშენებლობის პროექტის 220 კვ ეგზ-ის მეორე (კმ 20-კმ 40) სექციის განსახლების სამოქმედო გეგმა (RAP).

3. სს „საქართველოს სახელმწიფო ელექტროსისტემა“, EBRD-თან შეთანხმებული განსახლების პოლიტიკის ჩარჩო-დოკუმენტისა და განსახლების სამოქმედო გეგმის შესაბამისად:

ა) მოახდინოს, „ჯვარი-ხორგას ელექტროგადამცემი ხაზის“ მშენებლობის პროექტის ფარგლებში, 220 კვ ორჯაჭვა ელექტროგადამცემი ხაზის მშენებლობის პროექტის მეორე (კმ 20-კმ 40) სექციის ზემოქმედების არეალში მოხვედრილი მოსახლეობისგან პროექტის მიზნებისთვის საჭირო მიწის ნაკვეთების, მასზე დამაგრებული შენობა-ნაგებობების (ქონების) სარეგისტრაციო თანხის ანაზღაურება, საჭირო მიწის ნაკვეთების და ქონების გამოსყიდვა და სხვა სახის კომპენსაციის გაცემა;

ბ) უზრუნველყოს ასაშენებელი „ჯვარი-ხორგას ელექტროგადამცემი ხაზის“ ზემოქმედების ქვეშ მოქცეული, ანძის პოლიგონების განთავსებისათვის საჭირო სახელმწიფო, ხობის და ზუგდიდის მუნიციპალიტეტების საკუთრებად რეგისტრირებული ან/და დასარეგისტრირებელი ქონების იდენტიფიცირება, დასარეგისტრირებელი ქონების რეგისტრაციისათვის საჭირო შესაბამისი დოკუმენტაციის მომზადება და აღნიშნულ ქონებაზე საკუთრების უფლების რეგისტრაციის მიზნით, ამ დოკუმენტაციის სსიპ - საჯარო რეესტრის ეროვნული სააგენტოსათვის საკუთრების უფლების რეგისტრაციის მოთხოვნის უფლებამოსილების მქონე უწყებისათვის წარდგენა.

4. ეთხოვოს ხობისა და ზუგდიდის მუნიციპალიტეტებს:


ა) ამ განკარგულების მე-3 პუნქტის „ბ“ ქვეპუნქტით გათვალისწინებული იმ ქონების, რომელიც რეგისტრირებულია მათ საკუთრებაში, კანონმდებლობით დადგენილი წესის შესაბამისად, სახელმწიფოს საკუთრებაში მათი გადაცემის საკითხის განხილვა;

ბ) ამ განკარგულების მე-3 პუნქტის „ა“ ქვეპუნქტით გათვალისწინებულ იმ ქონებაზე, რომელიც იმყოფება „ჯვარი-ხორგას ელექტროგადამცემი ხაზის“ მშენებლობის პროექტის 220 კვ ეგხ-ის მეორე (კმ 20-კმ 40) სექციის ზემოქმედების არეალში მოხვედრილი მოსახლეობის სარგებლობაში, განახორციელონ სათანადო ღონისძიებები მოსახლეობის მიერ აღნიშნული ქონების სსიპ - საჯარო რეესტრის ეროვნულ სააგენტოში საკუთრების უფლებით რეგისტრაციის ხელშეწყობის მიზნით.

5. დაევალოს საქართველოს ეკონომიკისა და მდგრადი განვითარების სამინისტროს მმართველობის სფეროში მოქმედ სსიპ - სახელმწიფო ქონების ეროვნულ სააგენტოს, უზრუნველყოს, კანონმდებლობით დადგენილი წესის შესაბამისად, ამ განკარგულების მე-3 პუნქტის „ბ“ ქვეპუნქტით გათვალისწინებული ქონების და ამ განკარგულების მე-4 პუნქტის „ა“ ქვეპუნქტის შესაბამისად, სახელმწიფო საკუთრებაში გადაცემული ქონების სს „საპარტნიორო ფონდის“ კაპიტალში შეტანა, შემდგომში სს „საპარტნიორო ფონდის“ მიერ ამავე ქონების სს „საქართველოს სახელმწიფო ელექტროსისტემის“ კაპიტალში შეტანის მიზნით.

6. სს „საქართველოს სახელმწიფო ელექტროსისტემის“ მიმართვისა და კანონმდებლობით გათვალისწინებული დოკუმენტაციის წარდგენის შემდეგ, საქართველოს იუსტიციის სამინისტრომ და მისი მმართველობის სფეროში მოქმედმა სსიპ - საჯარო რეესტრის ეროვნულმა სააგენტომ უზრუნველყონ ამ განკარგულების მე-3 პუნქტით გათვალისწინებული სასოფლო-სამეურნეო დანიშნულების მიწის ნაკვეთების მიზნობრივი დანიშნულების შეცვლა, მოქმედი კანონმდებლობის შესაბამისად.

პრემიერ-მინისტრი



გიორგი კვირიკაშვილი